



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

Wolves-i Barcelona nungi
Trincao loan nung anir aruogo

Bolsonaro anema Brazil
nung longkak aiter



VOL. XVIII NO. 261 (ADOK 261) DIMAPUR

TENTONÜ (MONDAY)

CHITENI (JULY) 05, 2021

₹ 5.00

COVID-19 Nagaland: Nisung 25,519 nungi 23,077 taneptsü nguogo

BREAK UP OF NEW POSITIVE CASES & DEATHS

0	2	35	3	28	0
ARMED FORCES	RETURNEES / INBOUND	TRACED CONTACTS	FRONTLINE WORKERS	OTHERS*	NEW DEATHS

Kohima, July 4, 2021 (TYO): Nagaland nung COVID-19 puteter nisung 25,519 nungi 23,077 taneptsü nguogo aser iba ajanga taneptsü angur 90.43% kumogo.

Deobarnü nisung 68 dak COVID-19 aliba putet aser 86 taneptsü angu.

"Tanü nisung 68 dak COVID-19 aliba putet. Parnokji Mokochung nung 22, Kohima nung 20, Dimapur nung 18, Kiphire nung 4, Mon nung 2 aser Longleng o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Deobarnü COVID-19 puteta alir nisung 86 tashi taneptsü angu. Parnokji Kohima nung 25, Dimapur nung 23, Peren nung 19, Mokochung nung 9, Phek nung 6 aser Kiphire nung 4 lir" ta paisa ashi.

Tang nisung 1,234 anepaludar aser nisung 499 süogo, saka parnok 14 bo tanga tashidak

Assam forest li inch ka danga tanga state nem magütsütsü

Lakhimpur, July 4, 2021 (Agencies): Assam den kidanger state shinga nema forest ali inch ka danga magütsütsü, ta Deobarnü Environment & Forest, Fisheries & Excise Minister, Primal Suklabaidya-i metetdaksüogo.

"Assam den kidanger state tem aser ano Assam nung alirtemi forest land inch ka danga atsünga magidaksütsü aser atsünga agia alir ajak meindoktsü" ta pai ashi.

Deobarnü Lakhimpur Deputy Commissioner indang conference hall nung senden ka amendang Minister Suklabaidya-i iba osang metetdaksü.

Forest Regulation Act kübok ali temeten alirtem dak alaka tangar ajak forest land nungi meindoktsü, ta Environment & Forest department indang maparen meyipa repringdang Suklabaidya-i ashi.

ajanga asü, ta Dr Kikon-isa ashi.

"Nagaland nung COVID-19 alitsü akok ta temolung melemi bilemba sample 2,31,031 tendangogo. RT-PCR ajanga 98,426, TrueNat ajanga 62,444 aser Rapid Antigen Test ajanga 70,161 tendang" ta paisa shisem.

"Tang tashi nung nisung 4,62,399 nem COVID-19 vaccines indang dose 5,29,489 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,202, healthcare workers 15,823, arishi küm 45 ser tempur 1,54,688 aser arishi küm 18 nungi 44 tsünga alir 2,31,686 lir, ta paisa ashi.

"Vaccine agirtem rongnung nisung 67,090-i dose anaprong agiogo. Parnokji frontline workers 29,320, healthcare workers 10,632, arishi küm 45 ser tempur 29,320 aser arishi küm 18 nungi 44 tsünga alir 24 lir" ta Dr Thurr-isa metetdaksü.

Arunachal Pradesh-i ali hectare 2,436 aser local nisungtemi ali hectare 4,440 tashi atsünga agiogo. Forest land atsünga agiba nungi hectare 23 nungi nisungtem meindokogo, ta tanü forest ktdangsurtemi pa dang ashi.

Minister Suklabaidya-i ktdangsurtem dang civil aser police administration teyari agia Pobha reserve forest nungi ali atsünga agirtem meindoktsü atema ashi.

2016 küm sorkar akümsü tashi anguba sülen nungi Assam nung forest land hectare 3,400 tema ali atsünga agirtem ket nungi meyipa agiogo, ta taoba ita BJP-i aniba state sorkari metetdakja liasü.

"Taküm April aser June 23 tsünga, ali atsünga agirtem ket nungi hectare 915.05 meyipa nguogo" ta Forest department-i sangdong ka nung metetdaksü.

Niki Sumi-i Naga nunger anema inyakba anentsüla: WC, NNPGs

Dimapur, July 4, 2021 (TYO): Dimapur jila aser temeket nung Niki Sumi'er züngsemtemi tashiyim mapa inyakba atema khuret abener ta Working Committee (WC), Naga National Political Groups (NNPG)-i metetdaksü.

"Dec 20, 2020 nung Niki Sumi aser nisung ana aser ano Dec 25, 2020 nung Starson Lamkang aser nisung 50 temai Indian Army tsünga temai adokertemi Naga teloktem tsünga putepshiba, Ceasefire aser Naga kintemi pusema Gol o WC tsünga küm asem olemtepa aruba nung tetsükdaksü bentsür aruogo," ta Media Cell, WC, NNPGs sangdong ka nung ashi.

Iba osang ya Dec 26, 2020 nung Indian Army Chief Gen. MM Naravane-i metetdaksü aser tanü tashi Indian Army Chief aser NE nung par

commander temi kuli agütsüba nungi masetshir. Külen, Niki Sumi'er telokia parnok sen yong adokba masü ta ashir saka parnoki India yarinüba sayur, ta Media Cell-isa metetdaksü.

Ponkhuri, Pochury Region nungi Guwahati, Assam tashi aser iba sülen Delhi Indian Army cantonment tashi Indian Army helicopter ajanga senzüba kulitem meilongi temai adokdar.

Niki Sumi aser par telok ya Indian Army ama jenokdaksür aser senotsü teyari agütsür. Parnoki tanga telok nungi jena aoba nisungtem, özüng alema inyakertem aser ashikülakertem mesüzüka anioker. Iba ya Naga kintemi WC sempadaksütsü atema inyaker, ta Media Cell-isa metetdaksü.

"Niki Sumi-i mapang shia Naga kin lennirtem dang political agenda mesüra

takhangba kecha mali aser ajaki agizüktetba yimten latetba pusemstü ta shiyonga arur. Süra, kechiba pai tanga telok toktsürtem aser özüng alema inyakertem sen aser jenjang yong mesüzüka anioker? India sorkari santem rongnung shitsük ka chiokogo saka WC aser Naga kintemi ola madoki malitsü" ta parnokisa ashi.

WC, NNPGs-i tebilemba aser tangatetba ka nung külemi inyaker aser telok ka atema lendong bentsür arura kintem, GBs aser civil society tem den amalitepa iba anema noktaksü. Ashikülakertem dang nungi asen lima aser nübertem kümzüka ayutsü mapang ka aruogo. Tesüiba mapang nisung aikati inyakba aser tamakok anguba Niki Sumi-i bilemtetsüla aser Naga nunger ka ama alitsüla, ta Media Cell, WC, NNPGs-isa metetdaksü.

Assam lisopur Muslim nungeria tanur 2 policy agizüker: CM Sarma

Guwahati, July 4, 2021 (Agencies): Assam nung lisopur Muslim nungertemi state sorkari benokba tanur 2 policy agizüker, ta Deobarnü Chief Minister Himanta Biswa Sarma-i ashi.

State sorkari tanur 2 indang policy yangluba ya Assam nung Muslim nunger nütsüng yongsük aziüoktsü atema lir.

Deobar nikongdang Guwahati nung lisopur Assamese Muslim nunger shisashir 150 shi ka den senden ka amenba sülen Chief Minister Himanta Biswa Sarma-i iba osang metetdaksü.

'Alaap Alochana Empowering the Religious Minorities' ta ser shisashirtem den sensaksemogo, ta CM Sarma-i ashi.

CM Sarma-isa tangalen nungi aruba Bengali oshi jembiba Muslim nunger den senden ka amentsü ta ashi.

"Linük nung tematiba state pungu rongnung asenok adentsü süra, asenoki nütsüng yongsük kanga renlokba aziüoktsüla" ta CM Sarma-isa metetdaksü.

Külen, Assam nung Muslim nunger lokti-rongsenketsüng dak sendakba onüktem

repringshimsü atema sub committee 8 shimogo.

"Assam nung lisopur Muslim nungertem indang lokti-rongsenketsüng tebilemstü onüktem benoka jembigo. Iba atema sub committee 8 tentetogo aser parnoki ita asem tsünga osang agütsütsü" ta CM Sarma-isa ashi.

"Sub committee temi osang agütsüba nung ajemdaker sorkari lisopur Muslim nunger tashi itdaksütsü atema sentong atongsü aser ibaji taruba küm 5 tsünga inyaka aotsü" ta paisa metetdaksü.

Parliament monsoon session nung aluyimertemi lungkak aittsü

New Delhi, July 4, 2021 (Agencies): Parliament indang monsoon session mapang aluyimer telok kati Parliament kima anogoshia mener lungkak aittsü ta Deobarnü Samyukt Kisan Morcha (SKM)-i metetdaksü.

"Onoki Opposition Members of Parliament (MPs) ajak dangi shidi ka zülutsü aser iba nung Parliament telung nung farm law asem anema lungkak aittsü ayongzüksü" ta SKM tanishir kati ashi.

"Onokisa July 17 nü

opposition MP tem dang House telung nung anogoshia iba onük benoktsü ashitsü aser külen onokia anogoshia kima nung mener lungkak aittsü. Onoki opposition MP tem dang session nung medeni kimai malutsü ayongzüksü. Centre-i iba tebilemstü onük agizüka mangadang tashi session tanishir Gurnam Singh Charuni-i ashi.

Farmer union 40 tema nungi nisung pungugui Parliament kima lungkak aita nung shilem

agitsü, ta Gurnam-isa ashi.

Külen, Samyukt Kisan Morcha-ia July 8, 2021 nung totzü nung jenjang atuba anema lungkak aittsü ayongzükogo.

Taoba Mongulbarnü Cabinet Committee on Parliamentary Affairs (CCPA)-i July 19 nungi August 13 tashi Parliament indang monsoon session alitsü tebilemba shiogo.

Parliament indang monsoon session ya July ita tasembuba hopta nungisa tenzüka agir aser August 15 matongdang tembanger.

Covid-19 tashidak nokdangtsü atema senso shia teinyaktsü asem :

Tangar alidak teti teni
tebang nembang mask
temerük agiang;



Tangar den tsüktepa
tenokdak aser temen;



Teti sapon agi
teka metsükang.



Online ajanga tarnunger otsü ashiba tetoktepba alitsü

First Nagaland online folktale story telling competition

Presented by Naga Manu Production 

The competition aims to conserve and spread the message of preserving our traditional folklores.

FREE ENTRY

- > Video submission starts from July 5 onwards.
- > Videos will be uploaded on Naga Manu Production (YouTube) on first come first basis.
- > Last date of video submission : July 25
- > Result declaration : August 8
- > Mail us at Nagamanulaga@gmail.com
- > Or send WhatsApp document to 9916580774.
- > Entry must be submitted along with name, contact and tribe.

JUDGING CRITERIA

- #Presentation skills
- #Relevance/Significance
- #Creativity
- #Factual and authenticity
- #Moral of the story

PRIZES

- #1st prize : 6k
- #2nd prize : 4k
- #Youngest contestant : 1k
- #People's choice award : 1k
- #Judges choice award : 1k




JUDGES

- Asonuo
News Editor,
AIR, Kohima
- Rita Krocha
Journalist & Publisher,
PenThrill Publication House
- Alice Yhoshü
Journalist & President,
Kohima Press Club

Kohima, Chiteni/July 04 (TYO): State nung tang mezüngbuba süa, visual production house 'Naga Manu Production' ajanga Nagaland nung online ajanga tarnunger itsü shitepba tetoktepba sentong ka "Spreading wings to the untold Naga folklores" nung ajemdaker ayongzüksü, koba asen state nung mezüngbuba alitsü.

Putu ka nungi putu kati belenzüka aruba akhi tarnunger ostü wazüka ayutsü aser prokhsitsü atema iba sentong ya ayongzüksü, ta sentong ayonger Deobarnü sangdong ka nung ashi.

"Sobaliba samaa aoba ajanga asen otsüla-oboula nung indang otsü tajunga samaa aor. Tarutsü putu atema tarnunger otsü ya 'oral document' ka ama wazüka yutsütsü nükjidong nung iba tetoktepba ya ayongzük, ta ashi.

Iba tetoktepba ya virtual yimya nung alitsü aser angati shilem agitettsü, kong shilem

agirtemi July 5 nungi tenzüka parnok indang video ya agütsütsü akok aser July 25 ya tatem alitsü. Item video ya Naga Manu Production (YouTube) nung mezüngpurji mezüng süur upload sütsütsü.

Iba indang result ya August 8 nü sangdongtsü, kong Rita Krocha, Journalist & Publisher, PenThrill Publication House; Alice Yhoshü, Journalist & President, Kohima Press Club (KPC) aser Asonuo, News Editor, All India Radio (AIR), Kohima nungertem tetendanger alitsü.

Iba tetoktepba nung shilem agirtemi parnok indang video ya Nagamanulaga@gmail.com dangi mail asütsü mesüra 9916580774 dangi WhatsApp document yoktsü akok, aser otsü ashiba video den tenüng, arishi küm, contact aser kin tejangja inoker yoktsüla.

Tetoktepba ya 'Presentation skills; Relevance/Significance; Creativity; Factual aser authenticity and Moral of the

story' nung ajemdaker tendangtsü.

Otsü ya oshi mashi ka nung asütsüla saka English subtitles alitsüla, koba minute pezü (4) dak tema masütsüla aser 'background music' kangabo malitsüla, ta sentong ayongertemi ashi.

Iba tetoktepba nung Nagaland nung alir ajaki shilem agitettsü, saka otsü ya Naga nung tarnunger otsü nung ajemdaker alitsüla aser sübosolemsü balaka magütsü, ajisüaka shilem agirtemi pei sobaliba aben-süoshi asemtsü ajungshir.

Iba tetoktepba nung mezüng jenjang anur nem sen 6,000, tanabuba jenjang anur nem sen 4,000 agütsütsü, koba Kuvelu Tetseo (Tetseo Sisters) ajanga sponsor asür. Iba tetoktepba nung tanutsütila/tanubutisang nem sen 1,000 agütsütsü, koba Naroh Décor, Kohima ajanga sponsor asür. Maneni People's Choice Award aser Judges Choice Award alitsü, aser yangjia sen 1,000 agütsütsü.

St. Joseph University ajanga webinar ayongzükka agi

Dimapur, Chiteni/July 04 (TYO): Department of Commerce and Management, St. Joseph University, Dimapur ajanga July 3, 2021 nü Google Meet ajanga "Cryptocurrency and Bitcoin" onük nung national webinar ka agia liasü.

Iba sentong nung shisalen sayur ya Dr. Pranam Dhar Head

and Chairperson, Department of Commerce and Management, West Bengal State University aser All-India General Secretary, Indian Academic Researchers' Association, Trichy liasü.

University nungi aser danga nungi iba sentong nung nisung 140 shi dena liasü, kong shisalen sayur Dr. Pranam Dhar-i digital

currency, cryptocurrency, Bitcoin nungtugu akumba, Bitcoin amshiyim, item amshiba nung tajangzük aser timtem ajuruba indang jembia liasü.

Iba sentong nung adener nem parnok mangatetba jangjashitsü asoshi shisalen sayur dang asüngdangtsü mapang agüja liasü.

AR-i Cedeyevong nung sentong ka ayongzük

Dimapur, Chiteni/July 04, 2021 (TYO): HQ IGAR (North) kübok Kiphire Battalion - Assam Rifles-i Hokolbarnü (02.07.2021) Cedeyevong Village, Kiphire district nung tantsü-tambu aser tekolakpurtem den sensaksemba sentong ka ayonga agiogo, ta sangdong ka ajanga metetdaksü.

COVID-19 wara nungi kümzükka alitsü asoshi tali küm dangshitsü aser nübur dang Covid vaccine agitsü ajungshitsü atema iba sentong ayongzükka liasü.

Tang ama tensa tamajungdang, Assam Rifles ajanga iba ama sentong katsüba

atema lisopurtem aika angazüksü maongka anur aser COVID nungi jenboa/kümzükka alitsü asoshi lisopurtem dang tekümdangtsü osang sangoktsüba den Assam Rifles aser nübur tsüngda tesendaktep tali akangshidaksür. Iba sentong asoshi lisopurtemi Assam Rifles dang pelaba metetdaksüogo.

Maneni, kasa anogo HQ IGAR (N) kübok Mokokchung Battalion - Assam Rifles-i Mokokchung, Longleng aser Mon District tem ayimjema süngdong atemba sentong ayongzük. 'Reimagine, Recreate, Restore' omen nung ajemdaker iba sentong agia

liasü.

Lipüküm kümzükka ayutsü aser asen meküta aliba libajen tajungba yanglutsü atema, ajaki akok tashi sündongtem atemba indang tongtibangtem lisopurtem dang metetdaksütsü nükjidong yur Assam Rifles-i süngdong atemba sentong ayongzük.

COB den item district nungi temulunger temi COVID temzüng nung anidaka süngdong tapu balala temoktsüogo. Lipüküm kümzükka ayutsü nükjidong nung longjemer inyakba atema lisopurtemi Assam Rifles dang pelaba metetdaksü, ta kasa sangdong nung shia lir.

Sovima village council ajanga khukhua aitsür

Dimapur, Chiteni/July 04 (TYO): Sen agütsüba dang nungi ak shi tilaba agütsü ta tai tonglokja mejangjaba nisung kari Diphupar B village anasa Neiphezou Khel Sovima nung shileper kar amokmerena yashi (July 2) parnok seret nung aser anünglen injang khaloktsüba khukhua aitsür, ta Sovima Village Council ajanga sangdong ka nung ashi.

Shi ozütsüba mapang seren shidak amshitsü asoshi shileper ajak dang nenshia ashiba den külemi, Naga Underground telok ka nungi ta shia nisung aliba tesem nung injang khashishiba ajanga yimjung meimba nüburtem tsüpudaksür, ta parnok ashi.

Mejangjaba nisungi shi aliba ya parnok sen agütsüba dang nungi tajemba asünunga temolunglemtsübo mali,

kechiaser parnok pener orr mapang tatsüka lir ang meyipa bener aru. Aser shi ya seret shidak modang ka asüyonga kasa tai adoker, kechiaser automatic prangbong bener nisung alidak injang khashishitsü mela mali aser iba ama mapa ya ozü litsü nungbo tatok mali, ta Sovima Village Council ajanga ashi.

Yimtsüng telungzük nung shileper dang nüburtemi sen agütsüba ama shi tuozük shidak agütsütsüla, aji mesüra administration dang aibelener merenshitsü ashitsü aser parnok indang trade licence tem agientsüdaaksütsü. Aser kasa mapang NNPG telok ajak dang iba ama tim masüba mapa meinyakdaksütsü aser yimjung nung aliba tensa menentsüba nungi nokdangtsü ajungshir, ta sangdong ajangasa ashi.

AR ajanga state nung sentong balala ayongzükka agi



Dimapur, Chiteni/July 04 (TYO): HQ IGAR (N) kübok Assam Rifles, Kiphire Battalion ajanga Kiphire District Task Force on COVID-19 pur den lungjemer July 4, 2021 nü Kiphire Town nung COVID-19 vaccination cum awareness sentong ka ayongzükka agia liasü.

Iba mapang Kiphire Town telungzük aser temeket nung alir nisung 200 shi nem COVID-19 mozü dose mezüngbuba agüja liasü.

Iba mozü ya District Task Force on COVID-19 aser Assam Rifles nungi medical staff temi agüja liasü.

Maneni HQ IGAR (North) kübok Assam Rifles, Jalukie Battalion ajanga Peren district kübok Tening, Peren, Athibung

asur Heningkunglwa nung July 4, 2021 nü Security Meet ka agia liasü.

Yimtsüng nung lenirtem aser sepaitem tsüngta sensaksem akatsü kanga nungdaka aliba sapang ka parnok lapokja liasü.

Iba sentong nung parnok COVID-19 tashidak wara aser mozü, Naga yimtenren, Army recruitment drove aser danga employment amala indang jembia liasü.

Lockdown mapang anogoshi timtem ajuruba aser nüburtem mapa manguba tebilemstü indang yimdaklirtemi jembia liasü.

Assam Rifles ajanga iba ama sentong ayongzükka atema yimtsüng nung ketdangsurtem aser police temi pelaba lemsatop.



Nütsüng züina aoba azüoktsü sentongtem benoka aliba dak sendakba nung pei tangatetba metettsü mechi Assam Chief Minister Himanta Biswa Sarma-i Deobarnü Muslim nung tashi temeteter nisung 150 ajurua liasü. Ibai sensaksemba senden ya 'Alaap Alochana Empowering the Religious Minorities' tenüng nung molungsentü tajung agi ayongzükka agiba liasü, ta CM Sarma-i ashi.

Meghalaya dak alaka Northeast state tem nung COVID-19 tensa tajungba kümogo: Centre



Guwahati, July 4, 2021 (Agencies): Northeast state tem rongnung Meghalaya dak alaka tanungba state tem nung COVID-19 ajemogo ta Centre-i metetdaksü.

Iba osang ya DoNER Minister Jitendra Singh-i ashi.

Meghalaya kübok Ri Bhoi district nung aliba tepuokdak ka nung nisung aika dak COVID-

19 putetba sülen DoNER Ministry-i iba osang metetdaksü.

"DoNER Minister Jitendra Singh-i tanga NE state tem nung positivity rate ajema akümba atema pelaba metetdaksüogo" ta DoNER Ministry sangdong ka nung ashi.

Northeast nung June 30 nü

test positivity rate 3.96% liasü saka July 2 nung 2.94% ajemogo, ta DoNER Ministry-i ashi.

"Jitendra Singh-isa Nagaland o Manipur state temi vaccine supply onük agizükogo aser Union health ministry dang rongdak tangatetba nung mapa inyaksü tuyu" ta parnokisa metetdaksü.

Shaeema-i linük nem naroküm bener arutsü

Guwahati, July 4, 2021 (Agencies): Guwahati nungi Shaeema Zaman Ahmed-i quantum physics research nung takok tajung anguba atema Assam aser India nem tenüing tajung bener arutsüogo.

Quantum physics tsütsü lai takok anguba atema, June 28, 2021 nü Denmark nung Aarhus University nungi la nem PhD agutsü.

Maria's Public School, Guwahati nung zünga aser Delhi University nungi lai Physics nung Masters renemba sülen, New Delhi kübok Zlife Education den science outreach & astronomy education nung Shaeema yakpang ser inyaka liasü.

Iba sülen, Shaeema maparen ajiteta, Aarhus University, Denmark nung la nem Marie

Skłodowska-Curie PhD fellowship agütsü aser Quantum-enhanced Sensing via Quantum Control (QusCo) EU programme nung lai shilem agia liasü.

Shaeema maparen tsütsü reprangdangra, lai quantum physics education, science outreach aser quantum control research nung 'quantum games' aser 'simulation tools' amshiba yimya aser iba ya ajanga temelenshi adokdaksüba tem bushisüingdang.

Quantum Moves 2 aser Lab Manager na den simulation tools' talisa Quantum Composer yangluba (design) maparen nung la shisatsü agüja yariogo.

Shaeema-i simulation tools' tsütsü agiba research study tem nung, kaketshirtem quantum

mechanics indang tajungba angazüksüsa bushiteta lir.

Iba den bendenloksema, la maparen ajanga quantum control problem' bentetsü aser quantum physics outreach training nung simulation tem amshiba ajanga temelenshi adokba indang jembir.

Prof Jacob Friis Sherson achaayangba kübok lai iba maparen inyaka liasü. Ano külen, external examiner' nisung temji University of Turku, Finland nungi Prof Sabrina Maniscalco aser University of Münster, Germany nungi Prof Stefan Heusler na liasü.

Shaeema ya Guwahati nung alir paediatrician, Dr Shabina Ahmed aser anesthesiologist, Dr Khafiluzzaman Ahmed na jala lir.



Deobarnü Assam chief minister Dr Himanta Biswa Sarma-i Union Minister of the state for agriculture and farmers' welfare Parshottam Rupala pelaa agizükdang agiba noksa angur. Dr Sarma den Assam agriculture minister Atul Bora nati Union Minister Rupala den senden ka amen. (Guwahati, July 4)

Mizoram nung tanur 59 dak Covid-19 putet

Aizawl, July 4, 2021 (Agencies): Mizoram nung tanur 59 densema nisung 243 dak novel coronavirus putet aser parnok züngsema nisung ajak agi 21,246 kümogo, ta Deobarnü health ketdangsürtemi metetdaksü.

Aizawl anasa Zoram Medical College (ZMC) indang RT-PCR laboratory nung nisung 42 dak Covid-19 putetba osang jangjaogo. Kasa mapang TrueNat ajanga nisung 24 aser district balala nungi Rapid Antigen Test ajanga nisung 177 dak coronavirus tashidak tasen putet, ta pai ashi.

District 9 kübok yimtsüing 83 nungi nisung 243 dak Covid-19 tashidak putet, kong Aizawl nung nisung timtiba - 152 dak puteta liasü; iba sülen Lunglei aser Kolasib nung nisung 41 aser 30 dak Covid-19 puteta lir.

Ano külen, Mizoram nung iba wara adoker külen nungi nisung 95 tashi süogo, ta pai ashi.

Sample 3,596 tendangba nungi tashidak tasen putet

asünung, anogo ka nung positivity rate shilem 6.75 liasü. Patient trok tashi ainlen senzüba osang lir aser tanungba nisung 237 tashi pei pei talidak nungi putet, ta pai ashi.

Tashidak puteta alir nisung 243 rongnung patient 123 dak iba tashidak temaitsü lir.

Tang, State nung Covid-19 tashidak agi shiranger nisung 3,897 lir aser Honibarnü nisung 355 densema state nung iba wara nungi taneptsü angur nisung 17,254 kümogo.

Mizoram nung iba wara adoker külen nungi tanü tashi nung sample lakh 5 dak tema tendangogo.

COVID-19 patient rongnung taneptsü angur shilem 81.21 aser iba wara agi asür shilem 0.44 alitsü.

Maneni, vaccination drive nung, Honibarnü tashi nisung 5,34,860 nem vaccine mezüing dose aser nisung 60,399 nem dose anaprongla agütsüogo, ta state immunisation officer Dr Lalzawmi-i metetdaksü.

Khowai lendong nung taküm samar mang ka ngutet



Selim Mia tasü mang arem nung apur adokba noksa nung angur.

Agartala, July 4, 2021 (Agencies): Tripura kübok Khowai nung telok kati nisung pezü tepsetba sülen anogo 13 lir, iba lendong nung taküm samar nisung asem rongnung tia makai densemer tasü mang ka Teliamura indang aremen nungi ngutetogo.

Tasü sang ya Sonamura kübok Bardowal tesem nungi arishi küm 16 tain Selim Mia (Hridoy) ta jangjaogo.

Nisung asem tepseter rongnung pua alir kati police dang kuli asüba sülen, Selim Mia tasü mang nguteta liasü.

Inyakyim agi melaba ama,

post-mortem agitsü atema, Selim Mia mang ya Teliamura Sub-Divisional Hospital-i yokogo.

Selim Mia tasü mang ya arem meta talangka nung rema liasü. Pa densema iba lendong nung asür nisung 4 kümogo.

June 20, 2021 nü telok kati Billal Miah (30), Zayed Hossain (28) aser Saiful Islam (18) nunger dak azükba mapang par asem den Selim dena liasü.

Nashi auyartem alitsü ta temolung melema bilema June 29 nü telok kati par pezüprongla dak züka tepseta yutsü.

Aluyimer kati COVID-19 vaccine team nem menti agütsü

Shillong, July 4, 2021 (Agencies): Meghalaya nung aluyimer kati COVID-19 vaccine agitsü atema arudang tajung Samaria mapa inyakba ajanga nisungtem kanga ajungmesogo aser tenüingsang agütsür.

East Garo Hills district kübok Chimagre Songittal nungi aluyimeri vaccine agitsü atema aodang health workers nem menti aika bentsür ao.

Pai temeim mapa inyakba osang den noksa ka social nung kanga proskhir.

"Wara mapang temeim mapa. Chimagre Songittal nungi nisung kati medical team nem par alu nung adokba

menti bener COVID vaccine agitsü atema ao" ta Meghalaya chief minister indang office-i noksa den külemi sangdonga liasü.

"Iba amala otsü ajanga ni meimchir dak tamang akaba ulushir" ta Twitter nung nisung kati ashi.

July 3 nü Meghalaya nung nisung 460 dak COVID-19 aliba puteta liasü aser parnok züngsema nisung ajak agi 51,035 kümogo.

Yashi East Khasi Hills district nung nisung pezü aser East Jaintia Hills o West Jaintia Hills district nung kaka asü, ta Health services director Aman War-ia metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, CHITENI (JULY) 05, 2021

Taneptsü angudak lima

Alima nung tashidak wara agi asenok kangshiba ya tanü tasen masü aser ana nung angatisa mesüaka sensakertemia akoktsüsa taneptsü angudak makaba tebilemsü yaa tanü tasensa ajurur masü, saka alima wara tesashiba arudang asenok tetsüsuba akümer aser taneptsü bushia talangkati moutet nisungtem asüba angudang asen anasa mozüki tulu tajung alitsü nungdakba indang kanga süoki ia bilemer. Tanübo joko koda masüji, government mozü kitem nung nungdak dena asenok kija, kibongtem, lokti aser arogotemi dena agütsür. Ibaji mirokmi tuluka moudaktsütsü asoshi mibang tepdangba mapa amato lir. Iba jagi asenoki meteta aser memeteti Covid-19 tongpang nung asenoki takok ngua raradagi ta bilemdi. Aji oda, tang Covid dak ya tan ser tarutsü atema asen lima nung mozü ki tajung lapoka renemtsüsubaji tang ya mapang tajung asütsü. Ibaji bilema taoba hopta nung asenoki iba osangkaket 'Koma süla' tapak nung " Impur Mission Hospital ya ABAM-i lenmang bushitepa Community Health Center jenjang tashi danga tua lapoktsü lenmang bushitep nung koma süla?" ta asüba tasüngdangba nung bilemdangogo aser aikati Impur mozü kiji ajak atema taneptsü angudak asütsüsa tuluba aser tajungba kuma yanglushidaktsünüba shisa tajung lemsatepogo. Atangji, Impur nung aliba ya mozükiji mozüki dangbo masü saka Impur nung akaba school-ji dena asenok dangi Yisu temeim osang tajung bener arua asenok nüchi kümdaktsürtemi lapoktsüba senmangtem lir. Asenokia itemjibo parnok tenüng nung asenok asoshi temoatsü kuma anepalutetsüla. Angazükba agi, Impur Christian Hospital ya mezüngbo Dr. James R Bailey arua mozü kiji par alidak ki kümer yangji lia 1909 kum nungi shirangertem anepalutsü tenzük. Iba sülenang 1955 kum kiji yanglushir yipten 30 lapoka mozü ki aküm. Iba mozü kidang Dr. Imkongliba aser Dr. Ngangshi nungertemi anir nurse aikati kanga junga inyakba agi nisung jenti taneptsü anguba otsü lir. Item otsütemji tanü lanurtem asoshi asen nübortem meima taneptsüba mapa inyaktsü asoshi tashi aser tangatetba angudak asütsü. Atangji, tang tashi mozü kiji meshibangi anepaluteta arubaji ABAM kübok Dr. Sashii anir Board of Trustees purtemi parnok shisatsü, nübo aser rongsen tenlaa inyakba ajanga lir. Tanga iba mozü kidang Covid agi shirangertem dena yaritetsüsa renema lir. Joko, asenoki bilemdangtsüsubaji, Impur Christian Hospital ya tang dang nungi jenjang tuluba nung shirangertem teimba yaritetsüsa yanglutetsü asü meyanglutetsü (?) ta asüba onük ya asütsü. Atangji, tanga ICH nun yipten 30 bo alitsü. Aji, government inyakyim nung Community Health Center (CHC) asütsü. Ajsüsa, yipten dang ashi, shirangertem yaritetsüsa CHC ka nung alitsüla doctortem maliba agi mozü kiji akhidang Dispensary aliba jenjang nung dang lir amai repringer. CHC ka nung Surgeon ka, physician ka, Gynecologist ka aser Padiatrician ka ta Specialist pezü alitsü nungdaker. Ashiko, asen lima nungbo Government CHC nunga Specialist pezü alitsüsubajibo yutsür kata mali ser dentist mesüra Ayush doctor ka nem dang mapa ajak nungloktsür yuja alitsüa akok. Itemji nübortemi asüngdangtsüla. Item nungdaktemji kodang bilemdangdir, Impur Christian Hospital agi CHC jenjang shitak tongteta mozü ki akümstüsubaji mapa temelabo masütsü. Aji, ABAM kijai meinyaktetsü aser tang aliba mozü ki aser kimong jagia meperitsü. Ajsüsa, nübortem asoshi nungdakra, ICH-ji ABAM-i tangar Mission Hospital tulu mesüra Corporate-tem den longjemer inyaktsü lenmang bushitetsü. Atangji, ICH-ji Impur nungsa masüyonga lenmang danga ngutetra tanga tesem tulu tesadem bushia oa amenoktsüa akok. Atangji, mozü ki tulu tajung lapoktsüsubaji sen, ali aser kiji dangbo masü saka sen atema masü saka shiranger aneptsünüba temeim aketba doctor aser nurse aika nungdaker. Item medical missionary-temji asenok lanurtem rongnungi adoktsüla aser itemji adoktetsü atema Nagaland nung Medical College akatsüla. Atangji, taneptsüba mapa yabo taneptsüner ajaki inyaktetla mapa masü, iba mapa yabo Tsüngremi taneptsü sempet agütsürtem kar dak alaka tashidak aser taneptsü mozü indang azünger tashitemeteteremi dang aneptsütetsü. Taneptsüba mapa yagi nisung ka nem arishi apuloktsür aser taküm tasen agütsür. Shitakbabo aji Tsüngremi dang inyaktsüba mapa saka Tsüngremi Pa melen inyaktsü asoshi shimtetba purtem nem iba taneptsü mapa ya inyakdaksür. Itemji bilema asenok arogotem longjemer asenok asoshi mozü ki tulu aser tajung lapoka asen lima ya taneptsü angudak lima kümdaktsütetra, yangji asenok dang masü tangartema taneptsü angutsü aser taneptsü dang masü saka tanga mapaa jenti adoka asen nübortemsa temoatsü agitsü.

OLEMSABANG

'PLASTIC RICE' TA JEMBIBA OSHI YA DIMAPUR NUNG POKTET ASÜ?

~ A.M.TOSHI JAMIR ,Director (rtd),GON.

Plastic aser Vitamin ta jembiba ya tangar oshi, saka asen oshi ama kümogo. June ita, 2021 nung jang tajung (natural/original) den jang tapu balaka (koba dang Plastic jang ta olulo jembiba), anaji meyokteper ayoktsü aliba/ayokba meteta kanga sashia osang prokshio. Meyokteper alibaji plastic jang masü saka tanurtem nem chiyongdaktsütsü atema nungdakba Vitamin tapu balala (fortigants/micronutrients) enoka jang tanük menungsar, original jang mesüka yangluba ta Sorkari jangjatsüogo. Tetezü, fortify asüba (temeyoktepeba) artificial jang.

MI MAPURA MOKOZÜ MADOKTSÜ/MALONGTSÜ ta asenoki jembir. PLASTIC RICE ta jembiba oshi ya kong nungi pokteta jembiyonga aru ta bushidang nung, oda, 2010 kum China lima nung olulo adokba nungi tenzük jembiba amai bushiteter. Züngshiba agi, Industry nung amshitsü atema plastic tamajungji teyanglurtemi (manufacturing companies) machine nung menungsar aser iba sentsüji temsüng (rice like white granules). Anungji yangji alir nübortemi jang nung plastic enoka yanglur ta jembitsü tenzük aser alima ajaklen iba osangji prokshi. Saka tanü tashi ibaji shitak ta bushiteta mali (no one has ever proved such a thing exist). Medenser, iba mapang nungji jang tera tamajung nung (ordinary rice) teronem menemba mozü tajung enoka yanglur (jangji kanga tajung ta sayutsü asoshi) bendanglen ayoktsü prokshi. China nungeri teyangluba jang (fake/artificial rice) nung potatoes, sweet potatoes, aser plastic meyokteper, ta Korea nunger osang kaket nunga prokshi. Ano danga olulo-a prokshi. Plastic Rice oshi-ji yamaji tenzük ta zülua angur.

2017 kum meta India lima nunga States khar nung plastic jang ayokba olulo/jang tajung den plastic jang meyokteper ayokba olulo / plastic jangji soror ayokba olulo balala tesem aika nung kanga mejungi prokshio. Item States nung ibaji atalok: Andhra Pradesh, Telangana, Uttarakhand, etc). Delhi nungbo High Court tashi oa case agütsüba (Public Interest Litigation) otsü lir. Uttarachand State nungbo chi longlonga polonger Cricket ball/plastic ball ama jokshishia tanurtemi asayaba asenoki nguogo. Plastic jang mayoker, ibaya tiazü olulo ta Sorkari ashir. Talisa, Chi polonger rubber/plastic ball ama asayatetba jagi nuburtem kanga süngmanga mangmangteper, aser DAL MI KALA HAI (Dal nung anak dena lir) ta tzümartemi jembir. Item ajak ya China nungi aruba Plastic jang ta nuburtemi jembir (CHIAKA KOYA-i ACHI; MECHIAKA KOYA-i ACHI (chiyongtsu samadang) ta tzüraburtemi shin O jembiba ama). JAOL TI PLASTIC TAKISHII; PLASTIC LAKA JAOL, ta Dimapur nunga olulo jembiba. Ano, ITO LAKA BAT TO MOORI NISHINA ASI, HOSHIAR KORIBO LAKI, ITOTO NOHOBBO, NOHOBBO ta social media ajanga Jalukie Town (Peren district) nungi jembiba/sayuba-a nguogo. Itemya June ita 2021 nung atalokba, saka kuli makaba olulo, plastic jang masü ta Sorkari jangjatsüoko. Dimapur ji GATEWAY TO NAGALAND ta jembir. Ano, asenoki memeteti, tangalen amaji Jang aita ali asü?

Plastic jang yanglubajibo tanü tashi kecha kuli tejangja bushiteta maka. Saka kechiba alima nung, artificial/fortified jang yangluba dak alaka, ano nübortem achi ajemtsü asoshi chiyongtsu tapu balala nung vitamin mozü (fortigants/micronutrient) balala enoka yanglur (fortify asür)? World Health Organisation-i (United Nations Organisation nung kongsang ka/agency ka) ashiba agi, alima nung, talisa, maka-mait limatem nung, nisungtemi achi-achemba chiyongtsütem nungji micronutrient/vitamin mozü agi peria enoka mali, koba ajanga nisungtem dak tashidak balala adoktsü aser temang anema malitsü. Vitaminsji, tatishitsü agi, iodine; vitamin-A; iron; minirals; zinc ; vitamin-B12, Folic Acid; calcium; vitamin-D (ano danga). WHO-i ashiba agi, nisung aika dak, HIDDEN HUNGER keta lir, tetezü, asenoki tepok sünga chia-achem yonga, aiben item nungjagi temang nungdakba vitamintemji peria magütsür, anungji asenok HEALTH majunger (malnutrition). Tetezü, asen temang nung, vitamin agi meperibaji asenoki memeteti atsüka alir.

India nunga achi-ajemtsü tem nung vitamin meyoktepa yanglutsü (food fortification) 1950 meta nungi tenzük (vegetable oil fortification; salt iodization, amala). Talisa 2000 kum sülenbo, chiyongtsü aika nung vitamin enoka yanglur, tongtipang sa Jang, Wheat flour, milk (etc). Ibaji, FOOD SAFETY STANDARDS AUTHORITY OF INDIA-i 2016 kum, FOOD SAFETY AND STANDARDS (FORTIFICATION OF FOODS) REGULATIONS, 2016 ajanga, item chiyongtsü nung vitamin enoka yanglutsü temelaba agütsü: (Wheat flour aser Jang nung Iron, Vitamin B12 aser Folic Acid enoka yanglutsü; Milk aser Edible Oil nung Vitamin A aser D enoka yanglutsü; aser Double Fortified Salt nung Iron aser Iodine enoka yanglutsü atema). Ano, Breakfast Cereals; Bread; Eggs; Fruit Juice; cereal based products; tea aser tanga beverages, aser infant formulas (ano aika) nung pa dak nungdakba vitamins enoksema yanglutsü (fortify asütsü) temelaba, alima tesem balala nunga agüja arudagi. Meyoktepa (artificial) yangluba chiyongtsütem asepa (packet/bag) ajak nung tamaittsü/noksa (LOGO)ji + F enoktsü aser kechi vitamins meyoktepa yanglu itemji tema nung zülutsü, ibaji tuyua ozüng yanglua lir. Fortification programmeji takok angütsü asoshi, tetezü, item osettemji yoktet-tsü asoshi, department-i public/layman nem jungjunga angatetdaksüsubaji Sorkar nukjidong ta ashir (" in order to scale up fortification, large scale awareness of fortification is needed to create demand-pull ").

Saka, Food fortification nung tekümdangtsü kaji, aiben item yangluba companytemi, tali tali ayoktsü atema vitaminsji (micronutrients) tali enoker aser ibaji temang asoshi kanga majung (food companies) have been criticized for indiscriminate enrichment of foods for marketing purposes). Anungji iba anema ozüng yanglua arudagi, tatishitsü agi, 2004 kum Denmark lima nung-a ibaji anema ozüng ka yangluogo (Food safety worries led to legislation in Denmark in 2004 restricting foods fortified with extra vitamins or minirals. Products banned include: Rice, Krispies, Shreddies, Horlicks, Ovaltine, and Marmite).

Jang tajung (original/natural) nung plastic agi yangluba jang meyokteper ayoker ta, yangi, olulo prokshiba ajanga tayoker (sellers) aser talirtem (consumers) nem onsara tekümdangtsü tesayuba (lesson) tajung ka agütsüogo. Ano Oshi tasen ka FORTIFY (ajungtsü atema meyoktepeba) ta public-i angazüksemogo. Fortification mapa ya maneni aotsü. Anungji Sorkari public nem, meteta alitsü atema, tesayuba jilia agütsü nung junger. STATE PUBLIC HEALTH LABORATORY aser item teinyaktsü mapaji kechisa (talisa tarutsü anogotem nung) public-i tali tejangjaba metetogo. Maka-mait asüyonga, aser jang nung vitamin tajung enoka yangluyonga, angati agütsü mesüra, sen agibo Artificial jangbo, tang yongjibo alia mechiyongli ta India lima nung public/layman-temi tangtetba ali asü?

PLASTIC RICE, China nung yanglur ta jembibaji shidak-a ta kuli tejangja tanü tashi bushiteta maka ta ashir. PLASTIC RICE ta olulo jembiba-ji Dimapur (Nagaland) nung poktetba oshi masü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

India nung Khristantemi Saint Thomas Day ayonga among



Yisu nütsüng Toma mezüng India tonga aruba sülen Kerala kübok Palayur nung pai Kangki songa yutsüba tesem- Palayur shrine noksa nung angur.

July 04, 2021: Yisu nütsüng Toma (Thomas) mezüng India-i arua Yisu Khrista osangtajung prokba sülen 72 AD nung Tamil Nadu kübok Chennai yimti anasa tepseta liasü; Toma-i Khrista atema taküm bendanga agüja asüba anogo- July 3 nung India nung Khristan denominations aikati tang mezüng Indian Christian Day (Saint Thomas Day among).

India nung Khristan yimsü ya bendanger yimsü ka ama züngshia Khristantem anema inyakba mapang nung iba anogomong ayongzüka mongogo.

52 AD nung Yisu nütsüng Toma-i India nung mezüng Khristan yimsü proka liasü. Taküm nungi tenzüka küm shia July 3 nü ya Saint Thomas Day aser Indian Christian Day amongtsü.

Anogo aika jelia Gujarat nung aliba putir, Cedric Prakash-i shidi ajanga linük nung aliba Arogotem dang iba anogomong ayongzüka

amongtsü metetdakja liasü. "Iba ya tang mezüng ayongzüker, aser iba ya yimtenren dak sendakba masü mesüra yimtenren dang nungi teyari meshiba mapatong ka masü," ta putir, Cedric Prakash-i metetdaksü.

"Tesüiba küm ishika tsüngda India nung Yisu Khrista osang prokba putiotsü indang osang tai prokdar; iba dak alia telok kari tiyazü jembia Khristantem tenüng menüksütsü meranger," ta Prakash-isa metetdaksü.

Iba anogomong sentong ayongzükeritemi sangdong ka ajanga, "2021 küm mezüng iba anogomong amongba sülen nungi tenzüka Kibur Khrista sülen anidaker ka ama onoki India nung sobaliba kübok onok maitüsü (Khristan yimsü) wazüka ayutsü. Oshi-open, kin mesüra yimsü kecha mebandangi iba anogo mongner ajak den longjemer onoki iba anogomong amongtsü," ta metetdakja liasü.

Tang India nung Khristan

nütsüngbo shilem 2.3 shi dang lir.

2014 küm general election nung Hindu nationalist party-Bharatiya Janata Party-i takok anguba mapang nungi tenzüka India nung Khristantem anema inyakba kanga bulua ataloker.

"2014 küm ruling party (Bharatiya Janata Party)-i takok anguba sülen Khristantem anema inyakba timba kümogo. Hindu yimsü alia amangertemi kecha kuli makai Khristantem anema inyaker," ta yaküm Open Doors' World Watch List report ajanga metetdakja liasü.

Open Doors-isa, "Hindu nationalist temi India nung ka asütsü atema Hindu yimsü amanger asütsüla ta bilemer, anungji Khristan densema tanga yimsü amangertembo India nung masü ama züngshir," ta metetdakja liasü.

Tang India kübok state aika nung anti-conversion ozüngtem lir, aser item ozüng nung ajemdaker Khristan aser Muslim nung anema inyaker.

Kachin state nung Baptist Pastor 3 apu

July 04, 2021: June 28, 2021 nü Myanmar kübok Kachin state nung Baptist pastor asem puogo aser parnok asemprong küm asem tepuokdak ayutsü.

Myanmar nung yimjung atema sarasadem sentong ayongzüka atema pastor asemprong apu. Pastor asem ya Kachin Baptist Convention aser Rawang Baptist Convention nungi lir.

Taküm March 3 nü Nawngmun jila nung pastor tem jagi linük nung yimjung atema sarasadem sentong ka ayongzüka agiba atema Rawang Literature & Culture Committee (RLCC) chairman-i parnok anema ken o benoka liasü.

Osang angazükba agi, Penal code ka nung ajemdaker pastor tem anema ken o benok;

nüburtem tsübudaktsüba, osang tai prokba aser sorkar mapa inyakertem anema longkak aitba nung ajemdaker pastor tem anema ken o benok.

Kachin state nung Burma sepai aser democracy pusemertem tsüngda rara anentsü aser yimjung alitsü atema March ita nung pastor tem leniba nung sarasadema liasü.

Osang angazükba agi, pastor asempronglaji kanga tain aser health majung, saka July 12 nü court nung ken o angadangtsü atema June 29 nü tepuokdak ayu.

Baptist pastor tem tepuokdak ayuba anema Myanmar nung Khristantemi ola adoker aser aikati social media ajanga pastor tem atema sarasademjang ta mepishiogo.

Osangbener den jembidang Kachin Baptist Convention (KBC) Tir, Dr. Hkalam Samson-i, "Parnok anema obendang agütsüra onoki ibaji magizüktettsü. Parnok chioksüla. Kuli kecha makai nisungtem tepuokdak ayutsü atema obendang agütsüra nisungtem puoka ayutsü atema Myanmar nung jail agi meperitsü," ta metetdaksü.

RLCC chairman ya sepai yimsütsüba administrative body aser sepaitem den tesendaktep aliba Union Solidarity & Development Party nung züngsem lir.

Taküm February 1 nungi sepaitemi Myanmar yimsütsüba mapang nungi tenzüka linük nung Khristantem densema minorities anema inyakba kanga bulua kümogo.

ANOGO ABEN TSÜNGREM DEN

Anogoji tanü asütsü akok

Idangji asenok taküm alir, anünga alirtem, anüng nung Kibuba den ajuruteptsü parnok den külemi mepet nung ayipa atutsü. Aser yamaji asenok teti Kibuba den alitsü. 1 Tesalonika 4:17

Pauli arogo ayipa atuba indang jembir. Yisu alimai alutsü (t.16), aser pa pur anitentsü, Pa aruogo. Khrista nung asür tama shia arutsü, parnok tanela Kibuba den lir, parnok shia aruba temang tasen Kibuba den lungjemtsü. Aser shirnok taküm alir parnok den külemi Kibuba den mepet nung ajuruteptsü asoshi ayipa atutsü. Ibaji Yisui Yohan 14:1-3 nung ashibaji lir, "Nenok pei dangi agizüktsü asoshi Ni tanaben arutsü." Ibai küm tenet rishikangshir külen Yisu obendangtsü aruba den maitetptsüla. Laishir aikati ayipa atubaji timtem masü dang ataloktsü ta ratettsür, aser küm tenet timtem rishikangshi matalokdang Khristai Pa nübur, arogo alima nungi agiener atatsü aser Pa O bendangba arutsü.

Rishikangshi nung amangba mesüra rishikangshiba sülen amangba mesüra rishikangshi teyalung nung amangbaji tongtipangtebilemstsü masü. Tamanger shiai bilemstsübaji, "Teti tatem maka mapang ni kong intoktsü?" Ibai tongtipang tebilemstsü lir. Yisu kodang arutsü shingaia memetet. Ibai küm 500 sülen mesüra minute 5 tsüngda arutsü shingaia ashitsü makok. Shirnoki Yisuji Kibur ta amanger (Rom 10:9,10) parnok teti tatem maka Yisu den alitsü, shirnoki Pa magizüker teti tatem maka molumi nung alitsü. na renema lir ma? Mapangji tang asütsü akok.

Kibuba, ni kü taküm na asüng arutsü ama alitsü, kechiaser arutsüa kar.

Tan ita Justin Bieber-i Khristan concert ka nung shilem agitsü

July 04, 2021: Tan ita Chandler Moore-ia pa tatembanglen Los Angeles nung Khristan concert ka nung Justin Bieber-i shilem agitsü; Freedom Experience kenten sentong nungsa Kari Jobe, Chandler Moore, Tori Kelly aser Jaden Smith nungeria shilem agitsü.

July 24, 2021 nü Inglewood nung aliba SoFi Stadium nung iba kenten sentong agia 1DayLA tembangtsü. 1DayLA mapang nung volunteer 20,000-i hopta piyong LA county nung alirtem tenzüka aruba sülen kenten sentong agia tembangtsü.

'Freedom Experience' nungja ya Justin Bieber indang mezüngbuba gospel EP-Freedom nungi agizükba lir, aser iba ken ya taküm Easter Sunday nü sayaa liasü.

Pop kentener Justin Bieber kanga nungtugu akümba sülen pai pa music nung pa tamang jenjang-a lemsatepa arudar. Yaküm pa indang osangtajung ken "Holy" kanga nungtugu aküm; iba ken ya pa aser pa kinungtsü, Hailey na tamang jenjang indang ken lir.

Chandler Moore-ia pa indang Instagram ajanga 'Freedom Experience' sentong indang osang lemsatepogo.

Moore-i, "Iba ya kenten sentong ka dang masü. Iba kenten sentong jakdang nisung 20,000 dak tema adenshia LA nung alirtem tenzüksü, ki malirtem nem chiyungtsü agütsütsü aser LA nung alirtem tenzüksü," ta metetdaksü.

"Ibaji atangji Freedom Experience lir. Yisu teka aser tetsüng ama asütsü aser LA nung timtemertem ajak yaritsü," ta paisa metetdaksü.

Billboard den jembidang 1DayLA nungi Dominic Russo-i, "1DayLA aser Freedom Experience live concert sentong ajanga yimti nung aliba nüburtem dak aliba tashi aser tepor ajung sayatsü. Timtem aser rongjena aliba mongpu ka nung nisungtemi teimla, teyari aser temeim nungdaker. Iba sentong ya kodanga mamatetba maongka ka asütsü aser Los Angeles nung alirtem ajak kongshitsü," ta metetdaksü.

OLONG PAITEP # 5865

1			2			3		4		
					5					
		6								
							7			
		8								
9										10
					11	12				
13										
14						15				

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 5864 TELANGZÜBA

TIPILEN :	LANGTSÜNGLEN :
1. Semtu, 3. Lepko, 5. Bilem, 8. Ulu,	1. Sayu, 2. Teb, 4. Kimong, 6. Lungkak,
10. Tsüngpang, 11. Tesangwa,	7. Milak, 9. Zünga, 10. Temopu,
13. Aoksa, 15. Putir, 16. Yipru.	12. Walu, 14. Ali.

YABO MELENSHIDI NI

ALOKBA ASER TEBU NA

- Tebu : Alok oh alokba tang kechiba kera hao-ta masür? Nabo yangi ken arung jong.
- Alokba : Oba kechi?
- Tebu : Nabo dokan-i ken oang tamol sen 10 agi alir arung. (Alokba tera menur shilang)
- Tebu : Ni yakta arung ta ashiba to menur arung ta angateta na!?
- Alokba : Aaka Oba, Centre nungi, state nungi, lokti balala nungi, nijai-i sen aika sa agütsür sernung Foothill road ya taküm nungibo Jeep bo senzütetsü ta (Jeepable road) taküm nungibo, taküm nungibo ta küm kwika menur, küm 10 tema ogo saka alima nübur temia kecha mashira to? Na kechi oda minute 5 menu nung yamai rasarba?
- Tebu : Kua tamol alir arungba sen 10 to?
- Alokba : Aaaya Oba! Arogo kar kübok alir san ka kodang sati kuli agidir satir külen tenla aruba nungi lakh 5 arura ter shilem Rs. 50,000 arogo nem tenla agütsür, habijabi oda necktie, shirt suit amala sanuker nem agütsüba itemjibo dokjang, ser nung sentep kima telok chiyongdaksüba jaka nung angsung arogo-i par san satir shia tang tax Rs. 20,000 agir nung aser nenokia arogo nunger tangji shiangma ya santemi aser nüburtemi tenla agütsüba agi asüba hall ato? Na kechi senpak 10 atema aasatener, senpak 10 ji ni mettai alia chiogo!!
- Tebu : Ang ano senpak 10 agiang, niang lesson aika nguogo.
- Lilir : Sobangba, Dmp.

TANÜBO NAI LANGZÜANG

- Q. Global Cybersecurity Index nung India koba jenjang tongteta lir?
- A. 20 B. 10 C. 15 D. 12

(Taruba adok nung onoki langzüsü)

YASHI ADOK TELANGZÜBA : 1975

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Keri

(n) temeyong nung hon, taribi aser yin agi telonglong yanglur enokba (ring)

* Asangursangi aiürla nem hon agi yangluba **keri** tajung ka agütsü.

Kesen

(n) teka nung semokba (bracelet)

* Tsümartüsü teka nung **kesen** tapu aika semoker.

NAI-A YA METETTER MA?

NETFLIX SABANG AJANGA SAYUTSÜ ALIBA MOVIE ASER SERIES KAR: JULY 2021

- You Are My Spring - Netflix Series
- I Think You Should Leave with Tim Robinson: Season 2 - Netflix Comedy Special
- Cat People - Netflix Documentary
- Dogs: Season 2 - Netflix Documentary
- The Mire: '97 - Netflix Series
- The War Next-door - Netflix Series
- Major Grom: Plague Doctor - Netflix Film
- Resident Evil: Infinite Darkness - Netflix Anime
- Atypical: Season 4 - Netflix Series
- Biohackers: Season 2 - Netflix Series
- Virgin River: Season 3 - Netflix Series
- Ridley Jones - Netflix Family
- A Classic Horror Story - Netflix Film
- Heist - Netflix Documentary
- My Unorthodox Life - Netflix Series
- BEASTARS: Season 2 - Netflix Anime
- Deep - Netflix Film
- Explained: Season 3 - Netflix Documentary (New Episodes Weekly)
- Chernobyl 1986 - Netflix Film
- Trollhunters: Rise Of the Titans - Netflix Family

(Maneni asung adok nung...)

SUDOKU # 5905

TELANGZÜBA # 5904

		3		6	9		8		2	4	9	6	1	3	7	8	5
					3				3	7	8	9	2	5	6	4	1
2	9			4	1	7	5		5	6	1	8	4	7	3	9	2
			1	6	8		9		6	2	3	5	8	4	9	1	7
4	1	9			2				7	8	5	3	9	1	2	6	4
6			5	9	4	3		2	9	1	4	7	6	2	8	5	3
9		1		2		5	3	6	1	3	6	4	7	9	5	2	8
3	6	5			8				8	5	2	1	3	6	4	7	9
7		4	6		5		9		4	9	7	2	5	8	1	3	6

OJANG LUTEP # 5450

- NGKAA :
- SHDANISAGA :
- EMBIL :
- NGJYOIA :
- IPE :
- IKBNYAA :
- RIYA :
- ANDG :
- AJZÜKTSANGÜ :
- KOAK :

OJANG LUTEP TELANGZÜBA # 5449

TEJAKLEN ASER TESÜLEN TANGAR ALIBA MEREPRANGI ALIZÜNGJI TONGTETSÜ MERANGA ASEMANG

TAN HOPTA ATEMA - KOMA SÜLA ?

Q. Nagaland nung Naga nungerbo kibong nung tanur ajema asotsü atema masü aika asotsüang ajungshitep nung koma süla ?



July 04, 2021 nü New Delhi nung aliba Covid care centre ka nung oxygen concentrators, store nung rizünga ayutsü atema renemba noksa nung angur. Delhi nung coronavirus wara süngjemba sülen Covid care centre aika shibangdar.

Rafale ochimashi ken o ya JPC-i bushisüngdangtsüla: CPI(M)

New Delhi, July 04 (Agencies): India-i France dang nungi Rafale tayimtsü alitsü atema tezüngzüktep agiba nung ochimashi lir, ta metetdakja Congress-i iba ken o ya Joint Parliamentary Committee (JPC) kati bushisüngdangtsüla, ta takhangba agütsüba sülen CPI(M)-ia iba ken o ya JPC-i bushisüngdangtsüla, ta takhangba agütsüogo. Amongnü CPI(M) lenir, Sitaram Yechury-i twitter ajanga, June 3 nü Left party Polit Bureau senden amenba mapang telemtetba agibatam rongnung JPC nem Rafale ken o agütsütsü atema akhangtsü densema lir, ta metetdaksü. CPI(M) sangdong ajanga,

"Mezüng tezüngzüktep agiba nungi Ato kilonser Modi-i meyipshishir aser iba ken o nung ochimashi tulu lir, ta CPI(M)-i jembia aruogo aser tang France-i iba ken o bushisüngdangtsü atema judicial nem agütsüba ajanga ibaji jangjar," ta metetdaksü. CPI(M)-isa, "2018 küm September ita nung Polit Bureau-i iba tezüngzüktep agiba nung Ato kilonseri agiba shilem aser sorkari inyakba shilem bushisüngdangtsü atema Joint Parliamentary Committee ka tentetsü takhangba agütsüba, aser maneni onoki nenshia iba takhangba agütsür," ta metetdaksü. Honibarnü osangbenertem den jembidang Congress party

otongdar, Randeep Surjewala-i Ato kilonser, Narendra Modi dang Rafale ken o bushisüngdangtsü atema Joint Parliamentary Committee (JPC) ka tentetsü takhangba agütsüogo, ta metetdakja liasü. Congress lenirisa, "Rafale alizükba nung ochimashi aliba jungkai adokogo. France sorkari iba ken o bushisüngdangtsü tuyuba ajanga Congress party aser Rahul Gandhi-i jembia aruba kuli jangjar," ta metetdakja liasü. Sorkar nem tai tongloksüba dak sendakba nung Union minister Ravi Shankar Prasad-i, "Kechiba Congress-i ano maneni Rafale atema jembir? Supreme Court aser CAG-i iba onük nung tashishitsü kecha mangu," ta metetdaksü.

Uttarakhand nung ajemdaker BJP-i Mamata nem timtem agütsütsü

New Delhi, July 04 (Agencies): Uttarakhand nung Tirath Singh Rawat-i chief minister menden nungi anenba nung ajemdaker Centre nung BJP lenirtemi West Bengal nung Chief Minister, Mamata Banerjee nem timtem agütsütsü asalentong yangludat, ta osang angazüker. Taküm April ita nung West Bengal election nung Mamata Banerjee-i Nandigram menden nungi toktep saka takok mangu, anungji la Chief Minister akümba sülen nungi tenzüka ita trok tsünga lai election nung takok angutsüla.

TMC tongti lenir, Mamata-i lar constituency, Bhabanipur nungi tokteptsüa akok, kechiyong lar party MLA, Sobhandeb Chattopadhyay-i iba menden la atema azüngtettsüogo. Ajisüaka West Bengal nung by election atsülangdaksütsü atema Rawat-i kuli ashiba ama coronavirus wara nung ajemdaker Election Commission (EC)-i election atsülangtsüa akok. CM menden nungi sodi meshiba shidi nung Rawat-i coronavirus tensa indang metetdakja lir. May ita nunga Election Commission-i Lok Sabha menden asem aser Assembly constituencies 8 nung

election agitsü aliba atsülanga liasü. CM akümba sülen ita trok tsünga election nung taklok angutsüla, ta shia Rawat-i, temzüng nung ajemdaker EC-i state nung election mayongzüksüla, ta ashi. BJP leniri kati ashiba agi, "CM menden nungi anenba shidiji Tirath-i züluba masü saka July 2 nü pai BJP National Tir JP Nadda ajuruba mapang nung Tiri pa nem draft shidiji agütsü. Iba ya Mamata Banerjee atema by-election atsülangdaksütsü nükjidong nung inyakba lir." Taküm May 3 ü West Bengal election osang sangdongba sülen EC-i May ita nung agitsü aliba by election aika atsülanga liasü. Mamata Banerjee-i EC dang by election ayongzüksüla aser tekaraba nung election agitsü anogotem sangdongtsüla, ta takhangba agütsü arudar. Bengal Chief Minister, Mamata-isa election nüboyim atema anogo tajemba kümja anogo tenet dang lemmzüksütsüla, ta metetdakja liasü. EC ketdangser katibo, coronavirus tensa asadanga sülen ang by election agitsü atema telemtetba agitsü, ta metetdaksüogo.

Doctor aser nurse tem nem Bharat Ratna agütsütsüla: Kejriwal

New Delhi, July 04 (Agencies): Amongnü AAP tongti lenir aser Delhi Chief Minister, Arvind Kejriwal-i, coronavirus wara mapang nung nüburtem junga tenzüka atema doctor, nurse aser paramedics nem linük nung tematiba civilian award- Bharat Ratna agütsütsüla, ta ashi. Kejriwal-i shidi ka ajanga Ato kilonser, Narendra Modi dang, taküm küm atema Bharat Ratna award ji doctor tem, nurse tem aser paramedics nem agütsütsüla, ta mepishi. Iba award agütsüba ajanga wara mapang nung asür doctor tem nem chichiba tetushi

agütsütetsü, ta Kejriwal-i ashi. Kejriwal-i Hindi oshi ajanga Modi dang, "Corona anema raradang doctor aser nurse aikati taküm bendang tenlaogo. Asenoki parnok nem Bharat Ratna agütsüra ibaji ajanga parnok nem chichiba tetushi agütsütetsü. Doctor aser nurse lakh aikati pei taküm aser kibong atema mebilemi nüburtem tenzüko. Parnok nem tim tetushi agütsütsüla," ta metetdaksü. "Telok ka nem Bharat Ratna agütsütsü atema temzüng nung melira ni nü dang temzüng melenshitsü mepishir. Linük nüburtemi doctor tem dang pelar. Parnok (doctor tem) nem

Bharat Ratna agütsüra linük nung senso ajaki pelatsü," ta shidi nungjisa shia lir. India nung coronavirus tanabuba wave mapang nung iba tashidak agi doctor 730 shi süogo, ta May ita nung Indian Medical Association (IMA)-i metetdakja liasü. Bihar nung doctor timba (115) asü, Delhi nunga doctor 109, Uttar Pradesh nung 79, West Bengal nung 62, Rajasthan nung 43, Jharkhand nung 39 aser Andhra Pradesh nung doctor 38 asü. IMA-i ashiba agi, linük nung coronavirus mezüngbuba wave mapang nunga doctor 748 süogo.



July 04, 2021 nü Solapur nung Maratha organization züngsemtemi Maratha nung nem menden wazüka yujang ta takhangba agütsü longkak aitba noksa nung angur.

Pushkar Singh Dhami-i Uttarakhand CM tenangzükba agi

New Delhi, July 04 (Agencies): Amongnü Pushkar Singh Dhami-i Uttarakhand Chief Minister inyaksü atema tenangzükba agiogo; Raj Bhavan, Dehradun nung state Angh, Baby Rani Maurya-i ketdangtsüa Dhami Pushkar nem tenangzükba agidaksü. Uttarakhand cabinet tasenba nung BJP MLA tem-Satpal Maharaj, Harak Singh Rawat, Bansidhar Bhagat aser Yashpal Arya nungeria minister tenangzükba agi. Kasa sentong nung Bishan Singh Chuphal, Subodh Uniyal, Arvind Pandey, Ganesh Joshi, Dhan Singh Rawat, Rekha Arya aser Swami Yatishwaranand nungeria tenangzükba agiogo. Honibarnü BJP legislature

senden nung state Chief Minister menden atema arrshi küm 45, Dhami shima liasü. Osang angazükba agi, CM menden atema Dhami shimba ajanga Uttarakhand unit nung BJP lenirtem aika mepelar, ibayongji Amongnü anepdang yakta Dhami-i melung masüba party lenirtem karbo ajurua liasü. Dhami-i Satpal Maharaj-a ajuru aser pa nem narajung ka agütsü. CM menden atema shimtsüpurtem rongnung Maharaj tenüng-a densema liasü. Dhami-i Tirath Singh Rawat melener. CM menden nung ita pezü abensaba sülen yashi Rawat-i state Angh nem CM menden nungi anenba shidi ka agütsü liasü.



New Delhi, July 04, 2021: India nungersaisaponger nüngtugu, (asür) Milkha Singh nüngtem nung Ghazipur border nung ayongzükba Kisan Mazdoor Marathon sentong nung Bharatiya Kisan Union otongdar, Rakesh Tikait leniba nung aluyimertemi shilem agiba noksa nung angur.

Afghanistan nung Taliban-i tongtipang district tem amokbanger

Kabul, Chiteni/July 04 (Agencies): Northern Afghanistan len Taliban teloki jena oa aliba Afghan sepai ket nungi district kar rakzükogo, aser jena aortem ka karbo arrtsü alema oa Tajikistan nung jenoka lir, ta ketdangsürtemi ashir.

Taliban züngsemtem arrtsüleni aruba mapang Afghan mitkar züngsem 300 dak tema Afghanistan indang Badakhshan province nungi arrtsü alema aitogo, ta Tajikistan indang State Committee for National Security ajanga Deobarnü sangdong ka nung ashi. Afghan sepaitemi arrtsü ya Honibar aonung 6:30 (par mapang) ako meta ajang.

"Meimchir tangatetba tajung aser kidanger tajung aliba temaitsü Tajik ketdangsürtemi jena aruba Afghan sorkar meyong sepaitem Tajikistan telungi aiddaktsü, ta sangdong ajanga ashi. April ita tom nung US Tir Joe Biden-i Afghanistan nung 'tatem maka rara' tembangtsü sangdongba sülen linük tesem ajungalen Taliban telok asendenshir. Ajisiüaka jangja-jangja tashi parnok küboki aitba tesemtemji timba linük north

tsütsü lir, koba US aser külem NATO sepaitemi amokbanger liasü. Afghanistan nung district aser district centre 421 aliba nungi tang shilem asem shi Taliban küboki aiddaktsüogo. Tawa parnoki northeastern Badakhshan province agiba mapang rara meliasü, ta provincial council nung züngsem Mohib-ul Rahman-i ashi. Sepaitem tasü maitba ajanga Taliban-i takok angu, ta pai tenüing asen. "Tia maka district timba rara melie Taliban nem yutsür. Tesüiba anogo asem tsüingta district 10 tashi Taliban küboki ait, aser item rongnung district ti nungbo raraba meliasü," ta pai ashi.

Afghan sepai, police aser itdangiter noklang aikati parnok indang military outpost tem yutsür Badakhshan province indang yimtiba, Faizabad nung jenok, ta Rahman-i ashi. Faizabad temeket nung sepaitem tashi itshitsü atema sentong yanglutsü atema Deobarnü sepaitem senden ka menaka provincial ketdangsür kar iba yimti yutsür Afghan yimtiba, Kabul-i ao, ta pai ashi. (Maneni tapak 9 nung...)

Philippine military tayimtsü ka tsükok; nisung 29 süogo



Joint Task Force - Sulu ajanga yokba sayaba noksa ka nung Philippine military C-130 tayimtsü ka Patikul town, Sulu province, southern Philippines nung tsükoka aliba noksa nung angur. Deobarnü southern Philippines kübok mitkar indang tayimtsü ka runway nungi alema oa tsükokba lendong nung sepai 29 asü, ta ashir. Iba tayimtsü nung nisung 92 mena liasü.

Manila, Chiteni/July 4 (Agencies): Philippine air force C-130 tayimtsü ka Deobarnü anentsü merangba mapang runway nung manenteti tsükoka sepai 29 süogo aser tayimtsü tsükoker aliba nungi nisung 40 kümzükogo, ta ketdangsürtemi metetdaksü.

Defense Secretary Delfin Lorenzana-i, tekümzükba maparen maneni inyakdar, ta ashi. Paisa, tayimtsü nung pilot asem aser crew pongu densema nisung 92 mena liasü aser tanungba nisungtem ya army personnel tem liasü.

Philippines Air Force Lockheed C-130 plane nung sepaitem mener Sulu province kübok Patikul tesem nung anentsü merangba mapang tsükok.

Lockheed C-130 Hercules ya taküm küm military assistance ama Philippines nem US Air Force indang tayimtsü agütsüba rongnung ka liasü, koba Deobarnü anepdang Sulu province kübok Patikul jila anasa Bangkal yimtsü nung tsükok, ta Chief of Staff Gen. Cirilito Sobejana-i ashi.

Iba tayimtsü nung sepaitem southern Cagayan de Oro yimti, Sobejana nungi anir oya aliba mapang tsükok. Sulu province nung sepaitem küm aika Abu Sanyaf telungpurtem den raraa arudar. Tayimtsü tsükokba kuli tejanga tang tashi memetet.

"Kanga dang tia maka tatalokba ka. Tayimtsü runway nung manentet aser power tanaben bener arutsü merandang saka mekoki tsükok," ta Sobejana-i ashi.

Sobejana-isa, tayimtsü nung mena alir nisung 40 mozüki kati anirogo aser sepaitemi tayimtsü nung mena alir tanungbatem kümzüksü merangdar, ta ashi.

Philippines teyongtsülen tzüinglu kanga arudar, ajisiüaka Sulu tesem nung tzüinglu aruba ajanga iba lendong ataloka asü masü aji mejangja. Sulu kübok jila tongtibangba Jolo ya tenem lima ka nungi kilometer ishika pilar lir, kong sepaitem Abu Sanyaf telungpurtem den mapang talangka raraa arudar. Telungpurtem karbo Islamic State telok den sendaktepa lir.

United States aser Philippines napronglai Abu Sanyaf telok ya kiralongrar ta sangdongogo, shirnoki tesem tesem nung bomb pokdaksüba den, sen melen nisung pur aoer aser nisungtem tekolak tanga sädaktsür. Kümtem tsüingda sorkari takok tashi aziüktsü merangba ajanga iba telok tashimeiti lir saka maneni tetsübuttsü keta lir.

Japan anentsüh lendong nung nisung 20 samar bushidar



Tokyo anüolen tsütsü Atami nung aliba Izusan district nung tzüinglu kanga sashia aruba ajanga anentsüh alua ki raksatsür aliba noksa nung angur. Iba tesem nung Honibarnü tzüinglu kanga sashia aruba ajanga jana-reja den lishi dener tzü nungzuka alua nisung aliba ki kar nungbanga nisung kar samar bushir.

Tokyo, Chiteni/July 4 (Agencies): Japan kübok Atami yimti nung anentsü aluba sülen samar alir nisung 20 tang tebushidak lir, ajisiüaka tzüinglu kanga sashia aruba ajanga Deobarnü tekümzükba maparen balala inyakba nung tetsükdaktsü adokdaksüogo, ta Kyodo news agency-i ashi. Iba anentsüh lendong nung nisung ana süogo.

Ato Kilonser Yoshihide Suga-i, Honibarnü atalokba anentsüh lendong nung nisung 19 kümzükogo aser ki 130 shi tzümetsüing, anentsüh aser lishi

Kyodo-isa ashi.

Anentsüh agi kongshir aliba tesem nungi Deobar anepdang tashi nung nisung 387 aninogo, ta news agencies-isa metetdaksü.

Atami tesem nung anentsüh ya Honibrarnü 10:30 ako shi nung alu. Local TV nung ki chireper aliba aser lishi agi kitem tesadang nembanger aliba noksa sayuogo. Kasa mapang nung Social media nunga prokshiba noksatem nunga lishi agi gari nembanger aliba aser tekümzükertem tzü metsünger aliba tesem adena aoba nguogo.

Bolsonaro anema Brazil nung longkak aiter

Brasilia, Chiteni/July 04 (Agencies): Tir Jair Bolosnaro aser par sorkari COVID-19 tashidak wara junga ketdang mesütetba anema Brazil nung nisung meyrirjang aika longkak aita liasü.

Health ministry ajanga mozü aliba densema tawa ochimashi ken o kar temai adokba ajanga nüburtem longkak aittsü ya ajungmesoa liasü.

Taoba ita tashinung Brazil nung COVID-19 agi asür nisung 500,000 alemogo.

Alima nung iba tashidak agi nisung timtiba asüba linük, US sülenbo Brazil ya lir.

Ochimashi ken o nung Bolsonaro-i shilem agiba indang bushisüingdangtsü atema prosecutor general-i mepishiba ama taoba Hukulbarnü Supreme Court judge ajanga melaogo.

India nung yangluba COVID-19 mozü, Covaxin ya

sen jenjang tali temloker alitsü atema ketdangsür kari süpokrem agitsü molungogo, ta ita asem tejakdang ministry nung nisung kati temai adokjaka Bolsonaro-i kecha meshitet, ta tai tonglokja lir.

Paibo aibelen mapa meinyak ta ashi aser pa menden nungi atsüingdoktsü atema tiaizü nung tai tongloktsür, ta ashir.

COVID-19 tashidak wara anema raraba nung linük ajunga melungjemtetba, mozü, lockdown aser mask agiba nung tamang makatetba atema Tir Bolsonaro ya kanga sashia aija arur.

Linük nung tensa kanga majung lir, kechiaser tang tashinung lanur shilem 11 dang mozü agiogo, ta tawa health institute Fiocruz ajanga ashi.

Taoba ita yimti aika nung restaurant, bar aser dokan tem lapok aser yimtung nung nisung aikati face mask magi mesür social distancing yimya mamshi.

'Global Dance Visual Competition' nung Lam-i takok angu



Kohima, Chiteni/July 04, 2021 (TYO): Online ajanga ayongba global dance competition nung, India tenüng nungi Naga tsür Lam Grace Touthang-i shilem agia takok nguogo. 'World of Dance' aser World of Dance Records ajanga ayongba "Global Dance Visual Competition" nung Solo Category kübok Grace-i mezüing jenjang ajangzüktet. Iba den külemi, 'Best Cinematography' atema la nominate asü.

Grace, shiba Chemistry nung Graduate asü, la ya freelance Dancer, Dance instructor, Nagaland Dance Fiesta indang event manager aser Youtuber lir. Grace ya Dimapur district kübok Bungsang Village, Medziphema nungi Lhunkhosei Touthang aser Anem Touthang na jala lir. La Kohima nung soa inet.

Tsüingsanger ka ama, Grace arishi küm 7 alidang nungi tsüingsangtsü jangraba aser la

nükjidong ataloktsü asoshi mangdang tulu yur bendanga agüja inyakba indang lai lemsatapa liasü. Tang, la mangdang atalokba den külemi alimai la meteta kümogo aser la sempet ajanga State aser linük nem tenüng tajung bener arutsüogo.

"Iba tetoktepba nung takok anguba ya tebang agi rasa ashitsü makok. Iba takok ajangzüktetba asoshi pelar aser nümatanger," ta Grace-i ashi.

NagalandExpress den jembiba mapang, Lam-i, ni arishi küm 7 alidang Tekülemki (Church) nung choreography tsüingsanga tenzüik. 'Step-up' movie ajanga Hip-hop dance kanga jangra liasü," ta ashi.

Graduate asüba sülen, Nagaland tenüng nungi 'Indian Hip-hop Dance Championship' nung shilem agitsü asoshi, 2018 küm la Mumbai ao, kong lai Top 6 tongtet.

"Iba mapang nungi,

Nagaland Dance Fiesta ta nünjga agütsür Dance sentong tem ni ayongzüik, koba Nagaland nung iba sentong ajanga International Dance Day Celebration mezüing ayonggük," ta lai ashi.

2019 küm, Goa kübok ayongba Hiphop International India Championship nunga, Grace-i Top 6 jenjang ajangzüktet. Taküm April ita, Global Dance Visual Competition nung, Best edits & effects category kübok aser iba den külemi Best Cinematography nung la nominate asü; aser Solo category nung lai takok angu.

Grace-i, TV Show/platform - World of Dance, kong dancer temi shilem agitsü kanga jangrar, iba sabang indang official instagram page ajanga Global Dance Visual competition meteta aküm, ta metetdaksü.

Iba tetoktepba nung shilem agitsü melar melar dang aser registration fee magir, ta lai shisem.

Season shia World of Dance ajanga music tasen ka adoker, kong dancer temi iba track amshia dance video yanglutsüla. Iba sülen dancer temi yokba video ya Choreography aser video production tem asadanga tendanger, ta lai metetdaksü.

Maneni, lai video yangluba maparen indang jembiba mapang Grace-i, Beatz On Mongolian telok nungi dancer Bhuban-i video tangoktsü atema teyari agütsü aser kü sasa iba video edit süa yanglua liasü, ta lemsatet.

India nung yangluba vaccine dak tamang akar: Vidya Balan



Mumbai, Chiteni/July 04, 2021 (Agencies): Bollywood actress Vidya Balan, shibai Amit Masurkar indang 'Sherni' nung shilem tajung agiba atema nübur aikati la nem tenüngsang agütsüogo.

"Alima ajunga asüingba coronavirus wara ajanga healthcare workers tem shisabuluba den anibelem ajak arema bendanga agütsür inyaker. Parnoki yamai meranga inyaka aser nüburtem iba wara nungi kümzüka ayutsü asoshi timtem jenti agiyongjia, hospital mesüra healthcare facility ka mesem dang tashi asenoki iba wara ajanga timtemba asangsang nung menguteter," ta Vidya-i ashi.

Linük nung doctor aser healthcare nübu ajak asoshi jembitsü mechi, nüngtugu actress yagi Vicks den longjemogo.

#TouchOfCare campaign ajanga iba brand yagi asür Dnyaneshwar Bhosale taküm otsü nung ajemdaker yangluba film ka tawa sayaogo. Bhosale-i meimchir atema aria bilemja inyabattem iba film ajanga sayur.

Alima ajunga asüingba Covid-19 wara mapang, tekübok jenjang nung alir kibongtem nungi tanurtem taküm kümzüksü asoshi medical teyari shitak agütsütsü nükjidong nung, Bhosale-i lenmang balala ajanga nungita yariogo. Bhosale ya doctor ka liasü, shiba Covid-19 wara agi asü. Bhosale-i pa sasa paediatric hospital ka yanglutsü mangdang tulu aliba mapang, tia makai pa süadok. Iba mangdang den pai kinungtsü aser tanurtem toktsür süogo.

Iba film ajanga, Bhosale aser pa ama bendanga agüja inyaker doctor tem shirnok coronavirus

tashidak agi taküm sama, parnok nem tetushi agütsür. Kasa mapang, parnok taküm alidang, iba wara agi shiranger taküm aika kümzüksü indang sayur.


"Meimchir taküm kümzüksü asoshi tebandang kecha melii inyakba atema Bhosale kinungtsü aser par kibong nem tenüngsang agütsür! Pai temeima mapa sayua aria bilemstüba ajanga nüngdakba pur tem taküm kümzüksü asoshi temelenshi adokdaksü. Covid-19 tensa tamajung dang, tangatetba tulu nung, Bhosale-i amang sangwa metitemi inyakogo aser pa ama tanga doctor aser healthcare workers tem anojungi iba akümüli nungi pilaogo. Bhosale mangdang ataloktsütsü aser Latur nung tanurtem tsüingda pa mapa tajung teti bilemtetsü asoshi, pa kinungtsü (Mrs. Bhosale) maneni la kinungbo tsüingsü nung anidaka inyaksüsa la nem tashi aser tasütait tanela agüjangma," ta Vidya-i lemsatet.

National Film Award takok angur, Vidya-i film aika nung tongti shilem agiogo; aser lai entertainment sabang nung dang masü saka industry dak sendakba maparen asoshi tasüita jembia aser ochi nung nokdaksü asoshi lenmang tem yangludar.

Tang ama tensa tamajung dang, iba wara nungi kümzüka alitsü asoshi nübur ajak kümdangshia alitsü mapatong nung lai pusemer.

Healthcare system aser iba wadang nung inyaker tem khuret pungbadaktsütsü atema, Vidya-i coronavirus anema raraba mapatong nung shilem agia India sensopur ajak dang vaccine agitsü asoshi ajungshiogo.

Priyadarshan indang project taruba küm tenzüksü



Mumbai, Chiteni/July 04, 2021 (Agencies): Film yanglur, Priyadarshan-i Akshay Kumar den longjemar taruba küm comedy film ka atema maparen tenzüksü osang sangoktsü. 2000 küm nungi blockbuster "Hera Pheri" series, "Garam Masala" aser "Bhool Bhulaiyaa" nung tena longjemar inyaka aruogo.

Taküm Akshay den külemi iba project tenzüksü bilema liasü, saka Covid-19 süshia maoba ajanga maparen ajunga thitemtsü, ta Priyadarshan-i ashi.

"Onoki iba project tenzüksü sentong renem saka tensa mejungi aoba ajanga maparen anentsüsa aküm. Iba ya "out-and-out" comedy film ka asütsü aser taruba küm tetenzüklen

nungi iba film tangok tenzüksü asalentong yangludar," ta director-i ashi.

Honibarnü, Akshay-i Priyadarshan den külemi tangokba noksa ka lemsatet. Raksha Bandhan indang set nung Akshay aser Priyadarshan na ajurutepa liasü. Iba film ya Aanand L Rai-i direct asütsü.

"@priyadarshandir ama tangar peladaktsütsü sempet aketba nübu ka den inyaksü maangka anguba ya jangratemtsü lir. Mapa tasak asüyongjia, pelatepa anogo süir!," ta Twitter ajanga Akshay-i lemsatet.

"Mapang talangka sülen, taruba Hindi movie atema nü den sensaksemtsü maangka angur aser @akshaykumar den

tanaben külemi inyaksü yongyar," ta Priyadarshan-i telangzüba agütsü.

Priyadarshan-i pa indang taruba film "Hungama 2" sayatsü terenemba lir. Iba film ya July 23 nü Disney+ Hotstar nung sayatsü. Hungama 2 ya director Priyadarshan indang 2003 hit comedy - Hungama den tatongtep film asütsü. Mezüingbo, iba film ya August 14, 2021 nü sayatsü bilema liasü.

Hungama 2 nung actor Paresh Rawal-i tanaben shilem agiba angutsü. Paresh dak alaka, iba sequel nung Shilpa Shetty Kundra, Meezaan Jaffrey aser Pranitha Subhash nung dena lir.

Maneni, Akshay indang Sooryavanshi, Raksha Bandhan, Prithviraj, Bell Bottom, Ram Setu aser Bachchan Pandey densema film aika sayatsü sentong lir. Filhaal 2 nunga pai tanaben shilem agiba angutsü. Iba ken ya 2019 küm sayaba Filhaal music video den tatongtep alitsü. Iba music video nung Nupur Sanon dena lir aser July 6 nü sayatsü.

Afghanistan nung Taliban-i... (Tapak 8 nungi...)

June ita tatemlen Afghan sorkari volunteer militia tem den tesendaktep yanglushia tashi mait Afghan sepai yaridaktsü, saka Badakhshan district nung sepaitem temolung ajak agibo merarar, ta Rahman-i shia liasü.

Kandahar nunga aonung kanga sashia Afghan sorkar meyong sepaitem den raraba sülen tongtipang district ka Taliban teloki agi, ta ketdangsurtemi Deobarnü ashi.

Kabul anasa Bagram airbase nungi US aser NATO sepaitem

ainshir anogo ana dang lir Kandahar province nung Panjwai district ya Taliban küboki aita daksü.

Mapang talangka nungi Panjwai telung aser temeket nung Taliban aser Afghan sepai tsüingta rara arura liasü, kechiaser ibai provincial yimtiba, Kandahar city anasa lir.

Taliban telok ya Kandahar province nung tentet aser Afghanistan nung yimsü süa arua lia US-i anir 2001 küm makdoka liasü.

Copa America: Argentina aser Colombia na semi asayatsü



Goiania, Brazil kübok Olympics stadium nung Ecuador den Copa America quarter finals asayaba mapang goai tasembuba idaktsüba sülen Messi aser Di Maria na pelatepba noksa nung angur.

Chiteni/July 4, 2021 jenjang nung asayamung tongtibang ka akoktsü atema pa kanga meranga asayaba ano timla masamai lir.

(Agencies): Honibarnü Copa America asayamung nung Ecuador 3-0 agi akokba asaya nung Lionel Messi-i Argentina team international goal 76buba idaktsüogo aser South American record atema pele goal ka agi memenepi lir. Iba asaya akokba sülen Argentina team semifinal-i iogo.

Messi-i asaya tatemi free kick ka ajanga goal ka idaktsü aser iba masüdag assists ana süja liasü aser iba ajanga international

mezüngbuba goal idaktsü aser iba sülen minute 84buba nung Lautaro Martinez-i tanabuba goal idaktsü liasü. Goal anaprongla ya Messi-i assist süja liasü.

Asaya tatemtsü lia box tema nungi free kick ka ajanga Messi-i Argentina atema tasembuba goal idaktsü. Iba asayamung nung pai goal pezü idaktsür lir.

Asaya nung goal 1-0 ta aliba mapang goali daktsütsü asoshi Argentina-i maongka aika angu saka magitet. Asaya tanabuba shilem nung Martinez-i tanabuba goal midaktsü tsüingda Ecuador team-ia ball ka post nung metsüa liasü.

Asaya tatemtsü lia Ecuador nung defender Piero Hincapie-i Di Maria alangdaktsüba atema red card agütsür tugudaktsü aser iba foul menaba sülen free kick metsüba Messi-i idaktsü.

Messi-i ashiba agi, semifinals tonga asayatsüji Argentina nükjidong rongnung ka liasü.

"Tang onok anisüngzüka Colombia den asayatsü atema bilemstüla. Parnoki kanga junga defend süogo aser kanga kara counter asür," ta Messi-i ashi. Pa asayaba yimya indang asüngdangba mapang, "jurila narokümtemji tongtibangba masü," ta pai langzü.

Olimpico Stadium nung asaya tenzüker minute 39buba nung Rodrigo de Paul-i

Wolves-i Barcelona nungi Trincao loan nung anir aruogo

Chiteni/July 4, 2021 tembanga liasü, parnok August 14 nü Leicester City den asayaa Premier League campaign tasenba tenzüktü.

(Agencies): Wolverhampton Wanderers-i, Portugal international forward Francisco Trincao, Spanish La Liga club Barcelona nungi season ka tepeyong asayatsü atema loan nung anir aruogo. Barcelona den tenangzüktepba yangluba nung pa teti atema alizüktsü atema lenmang sadema lapoka yua lir, ta Premier League club yagi Deobarnü sangdong ka ajanga metetdaktsü.

Arishi küm 21 tain asayar ya 2020-21 season nung Barcelona nungi 42ben asayaogo aser pai goal asem idaktsü liasü aser Copa del Rey akokba nung Ronald Koeman-i aniba team nem teyari agütsüogo.

Portuguese club Braga nung kanga junga asayaba sülen Trincao 2020 küm Barcelona nung arua aden. Braga nungi asayaba mapang pai tetoktepba ajunga nung goal 13 idaktsü aser iba ajanga Camp Nou nung asayatsü atema maongka nguteta liasü.

Wolves manager tasenba Bruno Lage-i asayar alizüba rongnung pa tanabuba asayar lir. Taoba ita Colombi nung defender Yerson Mosquera alizükba sülen tang pa club nung denogo.

West Midlands club, shirnok taoba manager Nuno Espirito Santo lenisüba kübok taoba season jenjang 13buba nung

no nisung ka dak tashidak keta aliba poteta liasü.

Organising committee tir Seiko Hashimoto-i Hokolbarnü ashiba agi, tetsükdaktsü kecha makai Olympics nung shilem agitsüpur 500 dak tema Tokyo tonga aruogo. Olympic nung shilem agitsüpur 11,000 shi aser Paralympic nung asayatsüpur 4.400 Tokyo-i arutsü aser iba den coach, tetendangertem aser Olympic ketdangsur meyirejang aika arutsü, ta pai ashi.

Asayamung ayongertemi tang tashi local fan tem dak sendakba nung telemteba agia mali, ajisüaka bendanger fan tem nembo ita ishika tejakdang tenokdangba agütsüogo.

Hopta ana tejakdang asayamung ayongertemi, indoor aser outdoor venue tem nung asaya reprangtsüpur shilem 50 bo arudaktsütsü, ta shiogo.

Ajisüaka hopta anabuba atonga Tokyo nung tashidak menar anogoshi timba küma aoba ajanga local organizers aser International Olympic Committee na ken o asadangshitsü atema iba hopta ajuruteptsü imlar.

Government medical adviser Dr Shigeru Omi-i, fan tem marudaktsüi asayabaji ajak dang tajungtiba asütsü ta shia arudar. Pai, wara pokteter aliba teyalong nung kechiba Olympics ayongzüka asayar ta asüngdangogo.

Serbia Olympic Rowing Team nungi züngsem ka dak covid potet Chiteni/July 4, 2021 (Agencies): Tokyo Olympics atema Japan-i aitsü merangba mapang Serbian Olympic rowing team nungi züngsem ka dak COVID-19 tashidak poteta liasü.

Iba osang ya Japanese health ministry-i sangdongba Japanese agency Kyodo-i Deobarnü metetdaktsü liasü.

Ketdangsurtemi ashiba agi, asayar ya Tokyo indang Haneda airport nung lokti nungi pilar temang anepaludar, ta ashi. Pa den külemi aruru pezüprngla airport anasa facility kati anirogo. Parnok Nanto nung training camp kati aotsü atema renemer liasü.

Nanto ketdangsurtemi ashiba agi, iba training camp athitsü akok.

Ugandan Olympic delegation nungi züngsem ana dak taoba ita Japan tonga aruba sülen coronavirus tashidak potet aser tang iba osang ya sangdongogo. Tokyo anasa Narita airport nung Ugandan team nungi nisung ka dak tashidak potet, saka tanungba team training agiba tesemi aotsü temelaba agütsü.

Iba sülen mapang tatsüka lira

no nisung ka dak tashidak keta aliba poteta liasü.

Organising committee tir Seiko Hashimoto-i Hokolbarnü ashiba agi, tetsükdaktsü kecha makai Olympics nung shilem agitsüpur 500 dak tema Tokyo tonga aruogo. Olympic nung shilem agitsüpur 11,000 shi aser Paralympic nung asayatsüpur 4.400 Tokyo-i arutsü aser iba den coach, tetendangertem aser Olympic ketdangsur meyirejang aika arutsü, ta pai ashi.

Asayamung ayongertemi tang tashi local fan tem dak sendakba nung telemteba agia mali, ajisüaka bendanger fan tem nembo ita ishika tejakdang tenokdangba agütsüogo.

Hopta ana tejakdang asayamung ayongertemi, indoor aser outdoor venue tem nung asaya reprangtsüpur shilem 50 bo arudaktsütsü, ta shiogo.

Ajisüaka hopta anabuba atonga Tokyo nung tashidak menar anogoshi timba küma aoba ajanga local organizers aser International Olympic Committee na ken o asadangshitsü atema iba hopta ajuruteptsü imlar.

Government medical adviser Dr Shigeru Omi-i, fan tem marudaktsüi asayabaji ajak dang tajungtiba asütsü ta shia arudar. Pai, wara pokteter aliba teyalong nung kechiba Olympics ayongzüka asayar ta asüngdangogo.

NCA office aser website amenokogo



July 3 nü Kohima nung NCA office aser website amenokba mapang NCA ketdangsurtem aser tanga ketdangsurtem tangokba noksa nung angur.

Kohima, Chiteni/July 4 amshitetsü.

(TYO): Kanga dang nüngdaka aliba Nagaland Chess Association (NCA) indang official ki aser official website, state yimtiba Kohima nung July 3 nü lapokogo.

Iba ki ya taoba NCA tir aser Retd Director, Agriculture Nagaland, Helie Rupreo-i lapokja liasü.

NCA ya Government Printing Press kübok Lower Chandmari nung amenoka lir. Rupreo-i, official website aser office amenokba ajanga NCA tejakleni aotsü aser takok ngua inyaksangshitetsü imlaba lemsatep.

Tejangrartemi nagalandchess.com ajanga NCA website lapoka

Maneni Rupreo-i, NCA tenzükerem, pusemertem aser tang Neiba Kronu (Minister for planning & coordination, land revenue and parliamentary affairs) tir ser NCA team-i Nagaland nung Chess asaya ajungkettsü atema tanen makai bendanga agüja inyakba asoshi tenüngsang agütsü.

Iba sentong ya NCA joint secretary Vekukho Soho lenisüba nung agi.

NCA ya Nagaland nung Chess Association tongtiba lir, koba 1989 küm tentet. Association ya Nagaland Olympic Association, All India Chess Federation nung züngoksema lir aser Federation-i officially agizükogo.

Euro 2020: England-i Ukraine koka semi-finals tongogo

Rome, Chiteni/July 4 pai Kane nem ball agüja mezüngbuba goal idaktsü.

(Agencies): Honibarnü Rome nung Ukraine den asayaba mapang Harry Kane-i goal ana idaktsü England team-i goal 4-0 agi asaya ayong ayonga kokogo aser parnok semifinal-i iogo.

Round of 16 nung Germany goal 2-0 agi akokba asaya nung goal ka idaktsüba sülen Kane-i Ukraine den asaya nunga minute pezü tsüingda goal ka idaktsü England tejakdang toktsü.

Asaya tanabuba shilem nung Gareth Southgate-i aniba team-i ano goal asem idaktsü liasü. Asaya nung Harry Maguire-i tanabuba goal idaktsü aser iba sülen mapang tatsüka lir kane-i tasembuba goal idaktsü.

Maneni substitute Jordan Henderson-ia England team atema goal pezüba idaktsü liasü. Parnok semifinal nung Mongolbarnü Wembley nung Denmark den asayatsü. England team-i tatemsa 1966 küm tongtibang asayamung ka kokteta lir.

England team iba asayamung nung tang tashi nung goal ka danga chia mali

Asaya nung Sterling-i tabelen nungi Ukraine defence nem kanga timtem agüja liasü,

mezüngbuba goal idaktsü.

Ukraine nung striker Roman Yaremchuk-ia Jordan Pickford tendanga liasü aser kasa mapang nung Declan Rice-i metsüba ball ka Bushchan-i nokdanga liasü.

Ajisüaka Ukraine team tebilemba balaka liasü aser defender Serhiy Kryvtsov yiruba sülen Dynamo Kiev winger Viktor Tsygankov-i pa minute 36buba nung melen.

Asaya tanabuba shilem tenzüka sülen minute ka majung tsüingda Kane dak foul menaba Luke Shaw-i metsü aser Maguire-i kanga junga tongokja tanabuba goal idaktsü.

Tanabuba goal idaktsür minute pezü lir Shaw-i agütsüba ball ka Kane-i kanga junga tongokja parnok goal asem agi tejakdang aküm.

Tottenham nungi nüngtugu asayar yagi hat-trick idaktsüter lila saka pai metsüba ball Bushchan-i kanga junga nokdanga liasü.

Asaya tatemi Mason Mount-i metsüba ball ka Henderson-i kanga junga tongokja parnok goal 4-0 agi Ukraine madak ayong ayonga takok angu.

BILEMDANGANG

"Teyaritep maliba lokti ka kodanga tejakleni maotsü."